

**JOHN WESLEY**  
**AJAR SEMBIANG KE – 14**  
**“NESAL ATI ENGGI ORANG TI ARAP”**

“Nesal ati ke dosa kita, lalu arapka Berita Manah!” - INJIL MARK 1:15

1. Mayuh orang ngumbai nesal ati sereta pengarap bejantil bendar enggau pun pengidup dalam agama Kristian. Sida ngadang semina nesal ati lalu disempulang pengarap, nya udah chukup dalam ngepun ke pejalai dalam perintah Allah Taala. Pemeretika bansa nya senutuk bendar enggau jaku tangkan Rasul Paul ngagai org Judah ti terus napatka pengidup sempurna. Rasul Paul ngerah sida; idup bepelasarka pugu ajar Jesus Kristus, ukai bepugu ke nesal ati ke beduduk ari kereja ti semina ngelebu, tang patut semina merekuh ba pun ajar pasal ke Kristus aja. Pesan tu minta orang Judah ke dituju surat iya, mesti idup dalam pengarap ke lebih ari nesal ati, lebih ari gamal pengarap ke diadang dalam runding sida. Nyadi, ungkup orang Kristian ti udah idup dalam pengarap Kristian, Rasul Paul meransang sida; majak belanda terus napatka adan, ngulih ke prais, iya nya kangau Allah Taala, ulih Jesus Kristus, ke mai iya ke serega (Pilipi 3:14).

2. Endang enda ulih disangkar; pemendar nesal ati sereta enggau pengarap sigi amat penting ke pun singkang pengidup dalam pengarap Kristian. Nesal ati tu nyengkaum kitai ngaku semua dosa, kitai ngasai amat salah sereta nemu diri nadai daya. Nesal ati tu pun jalai kitai tama ke dalam perintah Allah Taala, lalu iya sama penting enggau pengarap laban nengah pengarap kitai nerima Perintah Allah Taala ti penuh pengelurus, pemaik sereta pengaga dalam Roh Kudus.

3. Bakani gaya nesal ati? Bakani gaya pengarap? ti dikumbai kitai beguna bendar sebedau kitai nyadi Kristian, bakanya mega dua bengkah nya beguna bendar ba pengudah kitai nerima Injil Perintah Allah Taala. Kitai nemu bisi penemu kebukai pasal reti nesal ati enggau reti pengarap tu, baikka penemu nya sama tauka enda, tang kenyata bendar kitai beguna nesal ati sereta bepengarap dalam tiap bagi sukut pengidup kitai Kristian, lalu enti dua bengkah utai tu nadai, dia kitai enda ulih “belanda dalam lumba ke disediaka kitai.” (1Kor 9:24-27). Nesal ati enggau pengarap tu bela enda tau enda idup sereta tumbuh mansang nyadi adat dalam pengasih Tuhan baka sida ke udah tama dalam Perintah Allah Taala.

Bakani kitai nesal ati sereta bepengarap sepengudah kitai digaga lurus ulih Allah Taala? Tu tanya ke penting lalu endang sigi patut dipejuraika tauka ditimbal kitai. Pekara keterubah, kitai bejuraika “ba senentang ni ke patut ditesal kitai orang kearap ke Jesus?”:

### **I. Ulah / perangai nesal ati ba orang ke arap**

1. Nesal ati tu selalu mai reti berubah; berubah badu diulun dosa lalu nuju ati ti tuchi. Tang ba senentang tu kitai bejaku ke reti nesal ati nengah pemeretika lain mimit ari nya. Kitai deka bejaku ke reti nesal ati ti bechuan ke buah penemu tauka ari pengeleda kitai empu atas sesebengkah leman utai. Nesal ati ba orang ke arap nyerangkung pemereti sida empu ngelala diri bedosa. Pemereti tu bendar, taja kitai nemu diri anak Allah Taala, tang kitai sedar kitai mega agi bedosa, sereta orang bedosa ke nadai daya.

2. Lebuh keterubah iya kitai nemu darah Kristus ke nebus kitai; nya maya Tuhan nuangka pengasih Iya ke dalam ati kitai (digaga lurus ulih Allah Taala). Lalu lebuh perintah Tuhan Allah Taala nya bisi enggau kitai, endang sigi patut kitai andalka diri ukai orang ke agi diulun dosa, laban semua dosa kitai dianchurka ulih darah Kristus.

Belabuh ari nya kitai nadai agi ngasaika penyai dalam ati, lalu kitai ngadang penyai nya nadai agi dalam ati kitai. Ke nyata bendar, sekeda orang bisi ngira pengudahengah semua proses nya, dia sida lepas ari semua dosa. Sida tu ngumbai lebu orang Kristian digaga lurus, seluruh pengidup sida mega lalu terus dikuduska. Sida ke bakatu penuh penaluk percaya sereta teguh enggau penemu ke madahka semua dosa udah dianchurka lebu maya orang ke arap digaga lurus ulih Tuhan lalu ati sida nadai agi ngundan dosa. Sida nya tetap enggau penemu ke madahka orang ti arap nadai agi ngembuan dosa belabuh ari sida digaga lurus ulih pengasih Tuhan tauka lebu sida dikeringka ulih pengasih Tuhan, taja hal nya belaban enggau pemendar Jaku Tuhan.

Kitai nemu barang sapa arapka Kristus ada ari Allah Taala, lalu sida nya enda diau diulun dosa. Tang, kitai enda ulih setuju enggau penemu ke madahka kitai ti arap tu nadai agi berasai bedosa dalam ati kitai. Taja pan timpuh kitai digaga lurus, dosa enda bekuasa ba dalam ati kitai ke arap tang dosa tetap agi bisi dalam ati kitai. Nya alai saksi kitai Kristian ke ngelala diri mensia bedosa; nya sukut penemu ke chukup penting dalam tupik nesal ati ke nyadi batang randau kitai tu.

3. Orang kristian ke rebak diatu tebal agi ngadang diri nadai agi dosa telabuh sida digaga lurus ulih darah Jesus (Justification), Sida berunding sumbong sereta temegah pengadang ke pengidup diri kudus. Taja sida baru arap, sadar ke diri ditebus ulih pengasih Tuhan, tang sida tetap ngeringka penemu ke nyadang diri lebih tinggi ari ti patut, sida mina ngadang berekat ke datai nya upah pemadas sida lalu sida kelalu gaga dataika berekat nya baka utai ti ukai pecuma diberi Tuhan. Orang Kristian enda ulih tauka enda patut ngeleka ke pengarap ke Jesus ti Penebus. Roh Kudus empu besaksi enggau Roh sida; madahka sida anak Allah Taala.

4. Orang Kristian ke amat meruan sadar pengingin diri dalam ati, sida ngasai peneka tauka pengangkun nya belaban enggau peneka Tuhan. Sigi amat, lebu ati kitai percaya ke sesebengkah penemu diri empu, dia kitai sigi bebendar ngeringka penemu kitai nya. Peneka ati tu utai ke pun dalam ulah perangai kitai mensia, iya perengka ke penting ba tiap mensia ke bepenemu. Lebu Jesus ada ke dunya tu pan ngembuan peneka dalam ati diri. Enti Iya nadai peneka, tentu Iya enggai nyadi begamal baka mensia. Tang, peneka Jesus enda kala enda taluk ke Apai Iya. Ba tiap jam, tiap utai ti nyadi, indah lebu betapik enggau penusah ti balat; Iya tetap ulih nyebut “ukai nitihka peneka Aku, tang nitihka peneka Nuan.” (Mathew 26:39).

Tang, nadai siku orang kristian taluk taja sida ngembuan penaluk ke chukup dalam ke Apai di Serega. Ba sekeda hal, orang ti arap ngenuluka peneka diri lalu ngelaban peneka Tuhan. Sida mutus ati deka ke sesebengkah utai ti ngelantang ke ati sida, taja utai nya nyangka enda ngelangka ati Tuhan. Enggau nya mega, sida nulak sesebengkah utai ti pedis ba sida, taja utai nya utai ti kedeka Tuhan dalam pengidup sida. Nya alai enti sida amat tetap taluk ke Tuhan enggau pengabis pengering sida, dia sida deka bempas pulas ngelaban pengingin tubuh, pengingin mata, lalu nya ke nyadi bukti pemendar Tuhan bisi dalam pengidup sida lalu orang ke arap nya sadar Tuhan nya bisi dalam sida.

5. Pengingin tubuh, pengangkunka dunya, temegahka pengaya nya utai ti datai ari penemu dunya lalu iya belaban bendar enggau pengasih Tuhan Allah Taala. Pekara nya dikumbai pengerindu dunya tu, pengerindu nya balat matak pengidup kitai Kristian lelang kebukai. Sigi amat orang kristian ke baru ngepun ke pengidup baru, besaksika ati sida nadai ingin ke utai bukai kelimpah ari Tuhan Allah Taala. Orang Kristian ke lurus mega, madahka diri ambis ati rindu deka ngelala Tuhan: “Ngelala Nama Tuhan sereta ngemesaika Tuhan.” Lalu orang ke baru arap nyeru madahka, “nadai Tuhan bukai di serega dipenggi sida kelimpah ari Tuhan siku aja. Nadai siti utai didunya ke deka sida, kelimpah ari Tuhan siku aja.” Tang pengeransing nya enda tentu tan lama, laban kekadang pengingin tubuh, pengeraja mata, sekali ke pengangkunka dunya tau datai dalam sekelip mata aja.

Nya alai enti orang Kristian enda meruan bejaga sereta enda puh besampi, penginein ti jai nya deka datai baru dalam pengidup sida. Penginein ati kitai amat nekan penetap pengarap, iya amat nyeruga penginein pengarap kitai lalu tau ngugut ati kitai rindu agi ke utai ti digaga Tuhan ari ti rindu ke Tuhan empu ti ngaga semua utai dalam dunya tu. Dalam mela Tuhan, nyangka kitai sigi mesti berani ninggalka anak, bini, apai indai nyengkaum kaban belayan diri. Tang dalam singkang pejalai pengidup, kitai Kristian sigi ulih tekait enggau penginein dunya tu, lalu ba timpuh ke sama dia kitai Kristian diparit ngelupaka Tuhan sereta dibatak enggai kiruh ngiga pengelantang dalam Tuhan. Ari nya kitai Kristian tau bendar tepejuh dalam “penginein dunya / utai dunya tu ari ke mekuh ba penginein ke Tuhan Allah Taala.”

6. Enti kitai orang Kristian enda nguta pengidup kitai tiap jam, dia penginein ti bedosa bepun ari mata tau datai baru ngerawis runding kitai. Penginein nya ke matak runding kitai belematika utai manah sekali utai ti jai. Penginein nya tau bendar datai nyerang roh kitai nengah gaya gari ke dikena, pia mega nengah utai ti ngait ati kitai. Taja kitai nemu pemendar ke utai ti deka nyadi ba ujung dunya, tang kitai mudah amat tepejuh ngagai pemeli tu tauka penginein ti mai bedosa tu. Indah orang ke amat tegap bepelasarka pengarap ke Tuhan mega ngaku, penusah ngalahka penginein ke ada ari mata – naka pemalat penginein kitai lebu meda sesebengkah utai ti baru.

7. Sigi amat berat, taja kitai ti anak Tuhan sigi diletak ngalah pengangkun diri. Rasul John nyamaka ke pengangkun tu enggau temegah ke diri tauka ngasai diri lebih penting ari orang bukai. Pengasai ke bansa nya endang ada ari juluk ati ke deka minta dipuji orang mayuh. Orang ke rindu ka dipuji tu, tebal agi sida nya takut dikelarika orang. Orang ke seruran minta dipuji bekempit bendar kaul enggau orang ke takut malu ketegal utai ti dikemegah ke diri empu. Nyadi penginein ke deka dipuji endang enda meleka ari pengasai ke takut, lalu enti orang tu nadai nerima puji, nya nyadi panjuk ke pengidup semengat orang nya. Indah orang ke kering pengarap pan nunga leman bansa nya, nyalai dini endur alai orang ke amat enda ngembuan rundingka jai bansa nya dalam pengidup sida? nama kebuah pia? Laban orang ke kering pengarap sedar, penyai agi mengkang ba dalam ati sida. Ari nya pengelepaska semua penginein tu iyanya tubuh Jesus aja ke diregang ungkup dunya.

8. Kati kitai nadai ngasaika chara adat kitai dalam rinduka pangan diri nya, nadai lain ari chara adat kitai rinduka Tuhan? Pengerinduka pangan diri bereti nadai kepapas ati, sekalika pedis ati. Kati kitai bisi tetemuka kualiti ke bakanya dalam raban kitai Kristian? Kati kitai nadai kala tetemuka orang Kristian ke balat chemuru, orang Kristian ke enda sepenemu, orang Kristian ke ngaga petenah ke orang dalam genturung Kristian nya empu? Nya alai awakka orang ke ngasai nadai kala ngaga penyalah ke baka tu bela nuku pangan diri.

Sapa bala ke nadai sekali kala bisi ati nyemekih pangan diri? Enti semak nuan nadai ngasai dalam ati ka bemunsh, ngasai begedi, ngasai ati bepedik, lalu kati nuan nadai kala berasai chemuru? Kelebih agi chemuru ke orang ti bulih utai ti dikingin nuan. Kati kitai kala nemu takat penyabar pangan diri, kelebih agi lebu kitai dikemediska orang ti endang dikerinduka sereta suah ditulung kitai? Kati atur ti enda lurus atas kitai tauka orang enda merega utai ti digaga kitai, enda kala ngasuh ati kitai bedendam? Kati kitai nadai kala berunding deka malas penyai enggau pemadas? Nya alai belalau ke pansik endang tebal agi orang ngelaban jalai rinduka pangan diri.

9. Ati ti bedengki ngagai pangan diri sigi belaban enggau penginein kediri sama diri pia mega enggau penginein ka Tuhan. Pengangkun ke duit selalu nyadi urat penyai, lalu ati bedengki nya tau bepun ari pengangkun ke duit. Indah ba antara anak-anak Tuhan ti kudus pan, semina mimit keamat enda angkun ke pengaya dunya tu.

Martin Luther siku ari apai pengarap madahka diri nadai kala bisi ati ti bedengki dalam pengidup iya ari mit. Lalu enti baka nya, aku enda kakang madahka Martin Luther meh siku mensia ti ada ke dunya nadai kala bedengki dalam ati kelimpah Jesus

Kristus. Tang tu enda baka nya! Aku percaya nadai siku orang ke nyadi Kristian, dalam pengelama pengidup iya udah digaga lurus ulih Allah Taala (Justification), nadai kala ngasai ati ti bedengki taja pan semina mimit aja.

10. Laban orang Kristian bisi ngembuan ati dengki, dia mayuh orang ke belematika pekara tu pecayaka, ujung bagi ketujuh Surat Roma (Roma 7:14-23) ukai dituju ngagai orang ke dibaruh ulun adat dosa nundaka tuju pemereti Paul tang dituju ke ngagai orang ti dibaruh pengasih Tuhan. Orang ke idup dibaruh pengasih Tuhan meretika reti setengah ari bagi ke enam dalam surat Roma sigi nuju sida empu; sida nemu diri enda patut agi nyadi ulun dosa tang nyadi ulun pengelurus, ngambika nyadi kudus; nengah ngasika ajar Allah Taala ti bendar ti udah diberi Allah Taala pechuma ulih pengasih Iya dalam pengelepas ulih Jesus Kristus. Genteran tu madahka dalam genap iku kitai ke udah digaga lurus ulih pengasih Allah Taala sigi bisi nyimpan pengingin ke nitihka peneka tubuh diri empu.

Rasul Paul bisi nulis ngagai raban Gereja di Korint munyi tu; “laban kita agi nitihka chara dunya..” (1Kor 3:3), retinya Gereja di Korint agi ngembuan ati ke bedosa, sida jampat melakang ke Allah Taala ti idup. Sida di Korint agi nitihka chara dunya; sida agi kelepas, lalu belaya enggau pangan diri, amu, nyembah engkeramba, bejai orang, pemabuk, penchuri, ulah kamah, bedendam, rinduka penyai. Pengidup ke baka nya nyau beurat dalam sida, dataika pengarang sida dikeruga, dia penyai nya lalu tumbuh dalam sida. Sigi amat raban penitih Kristus agi ngembuan pengidup ke enda chukup sempurna, ke diadang enda ulih diputarka kitai kediri enti nadai penampak ari Tuhan. nya alai, diatu kitai mesti bejaga ari reti pengidup ke enda sempurna nya laban pengidup nya malut ati lalu berurat nyerumba dalam penesal ati kitai ke penyai.

11. Kitai mega enda tau enda meretika bakani dosa agi mengkang dalam ati kitai, lalu pekara tu sigi bekaul enggau jaku sereta ulah kitai empu. Nyalai ke di senakutka kitai iyanya jaku ke disebut kitai nyau lebih ari ke bechampur enggau dosa tang jaku kitai nya penuh dosa. Jaku ke bakatu bepun ari jaku ke dipansut ari ati ti nadai pengasih ke pangan diri. Sama mega enggau jaku ke disebut enggau enda beradat. Nama ko Jesus, “kereja ngagai orang baka ke dikedekaka kita kereja orang ngagai kita, laban nya reti adat, enggau ajar sida nabi” (Mathew 7:12). Jaku ke dikumbai dosa tu mega nyengkaum jaku petenah, berandauka orang, begosip, bejai orang lalu bejakuka penyalah orang ari belakang. Ni naka pemayuh orang Kristian ke enda nitihka chara ti enda bedosa dalam bejaku? Berapa pemayuh keamat nitihka chara beradat ari jeman kelua.

Enti semak bisi orang amat beradat dalam jaku tu, kati nuan siku ari orang ke meruan nyeliahka diri ari bejaku sebu bu ngapa? Bejaku ke utai ke nadai guna nya dikumbai dosa, lalu pekara nya ngenusahka Roh Kudus. Nya alai ba pengujung dunya, maya timpuh kitai dipenchara, semua jaku kitai ti nadai guna deka diakim Tuhan.

12. Kapatut bendar tiap iku orang mesti terus rajin bejaga sereta besampi lalu enda mudah tepejuh dalam penguji ari jaku ti jai. Sigi enda tau enda orang masang penyaga mulut sida lalu mesti meruan nyaga pintu mulut sida. Endang sigi mesti, siku-siku orang Kristian meruan disiplin diri dalam bejaku tauka ngibun jaku lalu jaku nya patut penuh enggau pengasih sereta penuh enggau garam ti semampai meri pengeransing sereta berekat ngagai orang ke ninga. Tang kati amat enda sida tebiuh dalam jaku ke nadai guna, tajapan sida nadai niat ba ati deka bejaku jai? Taja sida bejaku dalam Tuhan, kati jaku sida nya amat manah sereta jauh ari utai ti enda tuchi? Kati niat sida lurus? Kati sida bejaku semina deka ngelantangka Allah Taala? sereta ukai semina deka ngelantangka diriempu? Kati sida bejaku enda bekedalih lebu deka nitihka peneka Tuhan lalu ukai ngenuluka peneka sida empu? Kati sida deka terus merening ngagai Jesus Kristus lalu bejaku enggau Iya tiap maya dalam sida bejaku enggau pangan diri? Lebu sida ngelaban dosa, kati sida nadai berasai enda lantang ba dosa nya? Lebu sida belatih nyangkar diri, kati sida lepas ari penyumbang enggau penguntung diri? Lebu sida merindang orang ke tusah, tauka meransang tiap iku orang ngambika meruan

rinduka pangan diri sereta ngaga utai badas ke orang, kati sida nadai ngasai orang muji sida?

Kati sida betempik jari kediri empu lebu sida berunding kediri udah ulih bejaku ke utai ti manah? kati sida deka sumbung tauka sida ngadang orang bukai deka berundingka utai ti manah pasal sida lalu merega sida atas utai ti dikereja sida? Enti sida enda ngurangka basa dalam jaku, berapa pelayuh dosa deka lekat ba jaku kemanah ari orang ke arapka Tuhan? Nya alai nesal ati nya nyadi bagi ari pemendar Kristian tang hal ngaku dosa nya utai ti lain agi.

13. Kati amat orang Kristian nya ransing ati nesal, ni pelayuh dosa nya lekat ba pengawa ke digaga sida? Kati bisi pengidup orang Kristian ke enda salah dipeda nengah mata dunya, taja dikira salah nundaka Jaku Tuhan Allah Taala? Kati nadai mayuh orang Kristian sedar ke ulah perangai diriempu ke enda ngemuliaka Allah Taala? Kati amat nadai mayuh ulah perangai ke diayan ke sida, ti endang sigi nadai niat deka ngemuliaka Allah Taala, iya ke dikereja sida enggau enda penuh numpuka perening ngagai Tuhan? Dalam mayuh – mayuh pengawa dikereja sida, kati sida enda ngereja nya lebih nitihka peneka diriempu ari nitihka peneka Tuhan? Kati sida enda ngiga pengelantang ke diriempu lebih ari sida ke patut ngelangka Tuhan? Lalu lebu sida ransing deka bebadas enggau pangan diri, kati sida bisi ngasai ke mayuh penekul penanggul ke nagang sida? nya alai asil iya, utai ti dikumbai sida kereja badas jauh paw iya ari utai ke badas laban sida dibalut penyai.

Nambahka nya, kati sida nadai sebaka utai ti digaga? Lebu sida bela ninga Jaku Tuhan ulih nyelamatkan semangat sida, kati sida enda suah mansa Jaku Tuhan nya ngasuh sida takutka ukum ari ti mai sida ngagai semaya pengelepas Tuhan? Kati utai nya enda selalu bisi dalam sida besampi, nemuka kediri tauka bebala mayuh? Lebu sida enggau nyambut Pemakai Penganang Tuhan, nama utai ti dirunding sida? Kati ati sida kekadang nadai rinduka pengujung dunya tauka sida dibalut runding ti ngeruga sida empu iyanya berundingka Tuhan begedi ke sida lebu sida nyambut pemakai nya? Nya alai ke nyadi motivasi sida bebalut, dataika sida lebih malu ke pengawa sida mela Tuhan dibanding enggau timpuh dosa ngulun sida.

14. Berapa pelayuh dosa ke udah diampun enggi orang Kristian ti amat nesal ati! Rasul James bisi nyebut “Nya alai, barang sapa nemu utai ti patut dikereja diri, tang enda ngereja iya, bedosa” (4:17). Kati orang Kristian enda sedar kediri enda mujur taja sida bebendar ngaga utai ti badas ngagai tubuh enggau semangat munsuh sida, sekali ngagai orang ke enda dikelala sida, pia mega ngagai menyedik ti sepengarap enggau sida? Lalu dalam sida menyalaika tanggungjawab mela Tuhan, berapa pelayuh penyalah ke digaga sida ketegal pengilap sida? Berapa pelayuh orang Kristian nyeliahka peluang diri nyambut Pemakai Penganang Tuhan, ninga Jaku Tuhan sereta datai ba gempuru besampi bebala mayuh tauka besampi kediri? Siku ArchBishop Usher madahka, utai ti patut iyanya pengudah kitai chukup bebendar mela Tuhan; kitai nyeru baka seput deka padam, nyebut tu “Tuhan, ampun ke aku atas dosa aku ke udah diampun?”

15. Kati laban setegal kelai kitai udah nerima pengampun ari Tuhan semina ulih dipeda ari perangai kitai ukai ari utaika bisi dalam lubuk ati kitai, nya ka mai kitai Kristian nadai nemu diri bisi penyai dalam diri empu? Kitai bisi penimpang ba semua utai. Kitai nadai ngembuan pengasih, basa sereta pengandal ba Tuhan. Kitai nadai mantaika pengasih ke bendar ngagai pangan diri pia mega ngagai orang bukai. Kitai amat nadai! indah kitai kurang amat pengasih ke menyedik indu tauka lelaki, anak-anak Tuhan, nemuka sida semak tauka jauh. Kitai enda ngembuan jelas ti bendar nitihka pematut. Kitai Kristian mekang dalam semua utai. Tang orang kristian keamat sedar ke diri empu deka bela baka Monsinyur De Renty nyeru, “Aku tu tanah ti penuh enggau durik –durik” tauka sida ngaku baka tu, “Aku jai; aku baruh lalu aku nesal laban aku baka abu enggau debu”.

16. Ngaku penyalah tu siti ari gaya gamal nesal ati ke nyadi ba pengidup orang ke arap ke Tuhan. Tang kitai mesti meruan bejimat. Kitai ke meruan dalam Kristus sigi amat enda diakim, enti kitai meruan beridup ba pengarap ke Kristus sereta teguh dalam pengarap, nyingkang enda nitihka penginein tubuh, meruan nitihka peneka Roh Tuhan. Tang taja pia bisi kitai kristian nikar baru baka sebedau kitai arapka Tuhan, kitai enda entap bepegai ba pengelurus Tuhan ti ketat. Ketegal kitai enda mujur taluk ke adat tauka pesan Tuhan, nya ke mai reti kitai amat patut mati. Nya alai enti ukai ketegal darah Jesus ti penebus kitai, tentu adat deka dikena ngakim kitai. Ketegal nya, dia kitai Kristian meretika; nama kebuah kitai patut diukum tang kitai enda diukum.

Ba dalam pengasaika diri udah salah tu, dia orang deka bisi 2 bengkah pengadang datai ba ati sida. Satu iya, sida ngadang diri dibaruh ukum tang kebendar ukai bansa nya. Kedua iya, sida ngadang diri patut dilepaska ari semua penyalah tajapan sida enda nesal ati. Mayuh orang labuh ba antara 2 bengkah pengadang nya. Pemendar bisi ba antara 2 bengkah pengadang nya, kedua – dua pengadang nya terus terang madahka orang ti arap ke Tuhan sigi tetap tau nerima ukum neraka, tang meh ukum nya ke endang patut ninggang sida, enda ninggang sida laban sida ngembuan siku penebus ti meruan enggau Apai iyanya Kristus ti idup, mati lalu terus nyadi antara ke meruan bediri ba antara sida lalu Iya nya meh ke nerima ukum ngarika sida.

17. Aspek tauka gamal bukai dalam kitai nesal ati lalu badu bedosa / betobat iyanya sida nemu diri nadai daya tauka nadai pengering. Bisi 2 bengkah hal ke bekaul enggau pekara tu:

1. Ba dalam ati orang kearap agi bedau baka sebedau sida digaga lurus ari sigi runding, niat ati, chara sida bejaku tauka ari segi kereja badas sida. Orang kearapka Tuhan sigi tetap apin ulih ngembuan pengentap / penegap ba jalai pengarap sida. sida enda ulih ngereja utai ti badas, sida enda ulih ngelaban kuasa sitan, sida nadai daya dikasak dosa, sida dibatak penginein dunya lalu diparit jalai diri empu. Sigi amat orang kearap ke Tuhan ulih ngaga semua utai ti ngerinduka Tuhan tang ukai nengah pengering sida empu. Orang kearap tu bisi kuasa ngalahka kuasa munsuh roh sida, laban “dosa enda bekuasa atas pengidup sida”. Pemenang ba orang kearap atas dosa ukai datai ari sifat iya ke mensia, tang hal nya semina ulih pemeru, anugerah tauka pengasih Tuhan aja. Orang kearap enda nerima kuasa ari Tuhan ke tau dikena sida betaun-taun, tang kuasa nya diterima sida ari timpuh siti ngagai timpuh siti.
2. Reti nadai daya ba orang kearap iyanya sida nemu diri sigi enda ulih nyeliahka diriempu ari bepenyalah. Sida enda mujur ngingkaska penyombong, penginein tubuh, pengerindu dunya, bepengeringat sereta ati ti deka limpang ari Tuhan. sida enda ulih ngelepaska diri dibalut dosa nya taja sida udah nerima pengasih Tuhan. Nengah penelaba, kitai nemu taja pan kitai udah bebendar ngena mayuh macham chara nyeliah ke penyai, tang penginein ti jai tu tetap dalam ati tiap rebak kitai mensia, lalu iya tekait ba tiap jaku sereta malut pengawa kitai. Nambahka nya, orang kearap amat nadai daya nyeliahka diri ari enda bejaku ke utai ti nadai mai penguntung tauka mai peransang ti ngangkatka pengidup ti manah. Ba dalam sida sigi enda ulih nyeliahka diri ilap ti mai bedosa lalu enda ulih ngubahka utai ti ditemu sida empu salah kelebihan agi ari segi pengasih sida, pengurang pengidup sida sereta ulah perangai ti bendar ngagai Tuhan enggau diri sama diri.

18. Enti bisi orang ke arap percaya ke orang ti udah digaga lurus ulih mindahka dosa ari ati enggau ari dalam pengidup sida; awakka raban sida ke percaya tang empai bisi pengandal ke pekara nya, nguji baka sida ti udah digaga lurus nya. Laban ulih ketegal pengasih sida udah nyambut berekat, nyalai awakka sida nya bebendar muai penyumbang, ngelengka pengingin tubuh tauka dosa asal sida. Awakka sida empu meda diri, sekalika sida ulih nuchi jaku jai, kereja jai sereta buah penemu sida ti nadai mai penguntung tauka peransang pengidup ti manah. Awakka sida empu meda diri, kati ulih sida ngelepaska diri empu ari semua dosa ti bepun ari pengilap diri. Ke pengujung iya, awakka sida nguji nyendiaka ubat ti ditemu sida ba sida empu kena ngubat pengurang tauka pengelemi ke mai sida bedosa. Awakka sida enda badu ngujika ensepek peneleba ke sesebengkah utai lalu awakka sida nanduk utai ti disepik nya beulang kali. Nama kebuah bansa nya? Ngambika sida makin sedar kediri nadai daya nyaup diriempu dalam semua hal.

19. Kenyata bendar, kitai kearap amat nadai daya. Nyau ka semua anak – anak Tuhan, ke mayuh macham leman besetujuka, semina ulih kuasa Roh Kudus semua perangai ti jai, dosa ari dalam sekalika ba luar ulih dilaban, dialahka sereta dilenyauka. Orang Kristian sigi setuju, tajapan kitai ulih ngelemika kuasa munsuh kitai tang kitai tetap nadai kuasa ngelenyauka sida. Tajapan anugerah / pemerik ke diberi ngagai kitai nengah kitai digaga lurus ulih Allah Taala, kitai mega enda ulih munuh munsuh roh kitai. Tajapan kitai berjaga sereta meruan besampi, kitai tetap nadai daya madam lengis utai ti udah nyadi sereta nuchi jari kitai ti kamah enggau beresi. Enggau penuh pengadang kitai sigi enda ulih nyadi tuchi dalam serampur pengidup kitai, dataika kitai nyebut ngagai Tuhan dalam ati “tuchi meh”. Laban semina nengah jalai nya siku orang balat merinsa sakit kusta dituchika. Semina nengah tu meh runding ti jai dianchurka lalu dosa asal kitai nadai agi. Enti nadai pengubahka baka nya, nadai singkang berubah ba orang ke udah digaga lurus, anang ke agi ba orang ti ngelaban Tuhan. Kitai mega tetap enda ulih tuchi, taja kitai udah bebendar nguji, kitai sigi tetap bedosa datai ke mati. Enti Tuhan enda bekereja dalam ati kitai, kitai deka tetap nesal dataika mati lalu sigi tetap diukum. Seagi – agi dosa malut ati kitai lalu berumah ba mulut kitai sereta nyadi buah pengawa kitai, nyangka sigi nadai jalai kitai ulih lepas ari penyalah enggau ukum penyalah nya. Ke amat endar, dalam pengelurus atur Tuhan, semua utai ti dirunding, disebut sereta dikereja kitai, selama iya meh nambahka penyalah enggau ukum ngagai kitai.

## **II. Lemana pengarap dalam pengidup orang ti arap ke Allah Taala**

1. Semua bengkah pekara ti udah dipejuraika aku nya pasal kangau Tuhan ngagai orang ke arap, ngambika nesal ati sereta badu bedosa. Tajapia nesal ati badu bedosa tu enda ulih ngubah pengidup Roh kitai kediri empu. Kitai mesti dulu nemu nama batang penyakit ba dalam kitai sebedau kitai disumanka. Nya alai lebu Tuhan ngangauka kitai ngambika nesal ati, Tuhan mega manggil kitai ngambika “percaya ke Berita Manah.”

2. Pengarap orang kearap mesti diperetika kitai nengah jalai ke nyelai laban iya enda baka semua utai bukai: pengarap tu enda diperetika baka kitai meretika pengarap ti mai kitai digaga lurus. Pengarap orang ke arap tu percaya ke Berita Manah ti bekaul enggau pengelepas ke disediaka Tuhan ke ungkup semua mensia. Pengarap ti mai pengelepas iyanya percaya ke gaya mua ari dalam mulia Allah Taala enggau Allah Taala ti ulih nyelamatkan kitai ke datai semak ngagai Iya ari dosa enggau nadai sekat ari segi timpuh maya. Jesus Kristus ulih nyelamatkan kita ari semua dosa ti bisi dalam kitai.

Jesus Kristus bisi daya ngelepaska nuan ari dosa ti malut jaku enggau pengawa nuan. Iya ulih ngelepaska nuan ari dosa lalu ulih ngenyukupka utai ti kurang ba pengidup nuan. Pengelepas Tuhan endang sigi mar ba kitai mensia, tang ba Tuhan Jesus nadai utai enda ulih. Nama utai ti bangat kelalu mar ba Iya ke bempu “semua kuasa di serega enggau ba dunya?” Ke penemu kitai, bemanifestoka daya Tuhan ngubah kitai ukai pelasar ti chukup dikena ngenegapka pengadang kitai ke Tuhan ti sigi deka ngereja peneka Iya. Beguna bendar ba Tuhan, mantaike sempekat Iya ti deka mandangka kuasa Iya ngarika kitai. Enggau nya Iya udah ngereja nya kekitai enggau nadai ngetu enda ngira maya tauka nama utai ti nyadi, Iya besemaya deka ngelepaska kitai. Nemuka ba dalam Sempekat Lama tauka ba Sempekat Baru, Kristus sigi udah meri ke kitai semaya ti berega sereta amat. Ko Jaku Tuhan: “Tuhan Allah Taala kita deka meri ati ti ngasi ngagai kita enggau ngagai peturun kita, ngambika kita deka rinduka Iya enggau pengabis ati kita, kita deka mengkang diau di menua nya” (Ulang Adat 30:6). Dalam Masmur 130:8 nyebut baka tu: “Iya deka nebus Israel ari semua penyai sida.” Baka nya mega dalam Bup Nabi Esekial 36: “Aku deka mechikka ai ti beresi ngagai kita, lalu nuchi kita ari semua engkeramba, enggau ari semua utai bukai ti udah ngamahka kita” Vs 25. “Aku deka nyimpan Roh Aku dalam kita, lalu deka ngasuh kita nitihka Adat Aku, lalu bejimat ngasika semua pesan ti udah diberi Aku ngagai kita.” Vs 27. “Aku deka ngelepaska kita ari semua utai ti ngamahka kita.” Vs 29. Baka nya mega ke ditulis ba Sempekat Baru:”Beberekat meh Iya ke datai dalam nama Tuhan! laban Iya udah nulung nemiak Iya lalu nyelamatkan sida. Iya udah meri siku Penebus ka kami... Iya udah nebus nemiak Iya ti kudus, semaya ti digaga Iya enggau aki ini kami Abraham ti diberi Iya ngagai kami mega, kami diselamatkan ari jari munsuh kami, lalu kami deka mela Iya enggau penangi nengah nyaga penuchi & pengelurus pengidup genap hari.”

3. Ketegal nya, kitai bisi kebuah ti tegap percaya ke Tuhan nya sigi ulih sereta sigi deka nuchi meresi semua pengamah, lalu ngisi semua pengurang sereta enggau dalam pengidup Roh kitai lalu ngambika Iya ngetas ngelepaska kitai ari tanchang semua dosa kitai. Ba kitai ti arap, kitai sigi tetenggapka penuchi ti bansa nya. Pengarap ke pengabis diguna kitai iyanya pengarap ti arap ke Jesus, ti nyadi pangan semangat kitai ka amat-amat rindu ngupas ngendas tauka nuchi meresi kitai. Tang kati Iya deka ngereja nya kekitai diatu sekalika pagila? Awakka Tuhan nyaut tanya nya empu: “nya alai semak saharitu tu, enti nuan ninga nyawa Tuhan, anang meh nuan ngeliatka ati diri”. Lalu enti nuan berunding ke pagila lusa baru nuan deka numpuka ati ningaka nyawa Tuhan, tang percaya meh Kristus keran deka nuchi nuan saharitu. Tuhan deka nyelamatkan nuan kemaya tu. “Peda, diatu meh maya iya”. Diatu Jesus Kristus bejaku “enti nuan ulih! Semina arap aja, nuan deka nemu, semua utai ulih magang ba orang kearap.”

4. Terus meh arapka Jesus “ti meruan kasih ke nuan lalu Iya udah meri pengidup Iya ke nuan”, “bai semua dosa ngagai regang Iya”, Iya nyelamatkan nuan ari semua ukum nengah darah Iya ti besembur ketegal kitai. Nengah chara nya, kitai deka terus idup dalam pengelurus. Lalu enti kitai deka mansang dalam pengarap, dia kitai deka dituchi ari dosa sereta dilepaska ari semua pengamah kitai, kitai diselamatkan ari semua penyalah enggau ari ukum kepatut ninggang kitai. Lalu pekara tu sigi dijamin penuh ulih pengarap ti meruan idup sereta mansang tegap, enti kitai tegap ba penemu bakatu:

*“genap hari, Tuhan, aku deka ke berekat ari pemati Nuan. Nuju pengadang ti lebih besai. Tiap hari, Tuhan, aku nyambut berekat ari pemati Nuan.”*



Ulih pengarap ba dalam pengidup enggau pematu Jesus ti ngarika kitai, dia pengubah ti baru ari timpuh siti ngagai timpuh siti sigi deka majak tegap sereta beresi. Tuhan ti nuchi ati enggau pengidup kitai, enggau nya diatu kitai nadai agi diakim tauka nadai ukum deka ninggang kitai.

5. Nengah pengarap ke sebaka, tang maya siku – siku kitai ngasaika kuasa Kristus, nya ba kitai empu. Semina nengah Kristus aja kitai ulih neruska pengidup kitai dalam Roh, enti nadai Iya tajapan kitai tuchi, sigi bisi maya kitai deka labuh dalam penyai. Tang seagi - agi kitai tetap nyimpan pengarap ka Jesus Kristus, dia “dalam pengaga kitai deka ngirup ai ari mata ai penyelamat kitai nya.” Kitai nyandih ba Jesus Kristus, “pengadang kitai ti mulia” ba dalam kitai, diau dalam ati kitai ulih pengarap lalu deka nyadi ke antara kitai enggai Apai Allah Taala, Iya ti muak ke sepiak kanan Apai Allah Taala. Ari Iya meh kitai nerima bantu dalam berunding, bejaku enggau dalam ngereja utai ti ngerinduka Allah Taala. Dalam book of comman prayer bisi ditulis bakatu: dalam semua pengawa, Kristus meruan bisi dimua sida ti arap lalu Kristus nya ngiring sida nengah jalai Iya meruan nyaup sida belama iya. Semua perambu sida, jaku sida enggau tiap pemutus ti digaga sida sigi dipelabuh, dipejalaika sereta ditembuka dalam Kristus. Kristus nuchi pikir runding ari ati sida, ngena penemu ti datai ari Roh Kudus, arinya sida deka chukup gagit rinduka Tuhan, lalu sigi patut tau ulih ngemuliaka Nama – Iya ti kudus.

6. Ketegal nya, dalam anak-anak Tuhan nesal ati tauka betubat nengah pengarap endang sechuan. Dalam nesal kitai ngeleda tauka sedarka dosa agi bisi malut ba dalam ati kitai, dalam jaku kitai enggau ba pengawa kitai. Nengah pengarap kitai nerima kuasa Tuhan ba dalam Jesus Kristus ti nuchi ati kitai sereta meresi jari kitai. Ba dalam kitai nesal ati tauka betobat mega bereti kitai sedar, kitai chukup tau tauka sigi patut ditinggang ukum atas semua ulah ti digaga, atas jaku ke ditibarka kitai enggau atas leman perangai kitai mensia. Nengah pengarap kitai nyau nemu, Pengajar kitai meruan bisi enggau kitai nyadi pengentara kitai enggau Allah Taala lalu Tuhan Allah Taala nya udah nguing penchara enggau ukum ari kitai nunga kebukai. Lebu nesal, dia kitai sedar kitai amat – amat nadai daya. Nengah pengarap meh kitai ulih nerima pengasih Tuhan tauka anugerah ti diberi Tuhan ngambika nyaup kitai lebu kitai begunaka Iya. Nesal ati tauka betobat tu nyangkar semua tulung ke enda bepelasarka Tuhan tauka iya ke ukai datai ari Tuhan. Pengarap tu nyambut semua sukung tulung ke diguna kitai ari Tuhan ti bempu kuasa atas langit enggau dunya. Nesal ati tauka betobat tu madahka bakatu:

“Enti nadai Tuhan aku nadai nama – nama utai ulih digaga.”

Pengarap kitai bejaku bakatu:

“Nadai utai enda ulih dikereja aku dalam Nama Tuhan laban Iya ti meri pengering ngagai aku.”

“Nengah Kristus Tuhan nya, aku ulih napik sereta muru semua munsuh semengat aku. Nengah Iya meh aku ulih rinduka Tuhan Allah Taala enggau pengambis ati, pengambis semengat, pengambis runding enggau pengambis pengering. Laban Iya enggau aku, dia aku ulih mela Iya dalam pengudus sereta dalam pengelurus ba tiap – tiap hari pengidup aku.”

### III. Batang ajar nuju pengidup kitai

1. Empas ari semua ke udah dipejuraika, kitai nyau nemu naka penyaruk meh kitai, enti bisi penemu ke madahka kitai sigi dikuduska lalu nadai agi pengamah lebuh maya kitai digaga lurus. Nama kebuah pia? Laban lebuh maya kitai digaga lurus, ati kitai sigi agi bedau serampur beresi ari semua pengamah dosa. Amat, enti nundaka disebut aku, lebuh kitai digaga lurus, dia kitai dilepaska ari kuasa pengamah dosa ke muakka dipeda tauka muakka ayan ba luar. Pia mega maya kitai digaga lurus, dia kuasa pengamah dosa ke ba dalam kitai, ke enda ulih dipeda kitai; dialahka nyentukka kitai berasai enggai agi diulun dosa.

Tang taja pia, ukai reti lebuh kitai digaga lurus, dia pengamah dosa ke ba dalam kitai ambis lengis dituchi. Tauka disebut kitai bakatu: ukai reti akar penyumbang, penginein ke kamah, pemangah enggau pengerindu ke utai dunya ambis lengis diangkatka ari dalam ati kitai. Hal tu mega ukai mai reti semua buah runding ti beduduk ba penginein tubuh enggau penginein ke deka nikar baru ngagai pengidup ke lama nya udah nadai agi tauka lenyau nadai agi ba dalam ati kitai. Pekara tu ukai baka munyi ke ku sekeda orang ke ngumbai hal tu nadai penyalah nama – nama laban udah dibaptisa tauka ngadang hal tu ukai utai ti berat. Hal tu ukai bakanya, iya amat berat / bahaya. Hal tu amat – amat nagang jalai nuju pengubah ti lebih jauh manah ba kitai, laban terang bendar nundaka Jaku Jesus “Orang ke gerai enda begunaka lutur, tang semina orang ke sakit” (Mat 9:12). Ulih ketegal nya, enti kitai berunding kediri udah chukup tegap sereta enda berguna agi digeraika. Dia kitai enda ulih ngadang pengelepas ari dosa nya datai berinsur – insur tauka sechara terus.

2. Kebendar iya, kitai begunaka ubah besai ba dalam pengidup tu; amat bepanggai ba penalam pengadang kitai empu agi bedau chukup sempurna; ati kitai bedau pengambis tuchi, kitai agi bepenginein jai lalu agi bemunsuh enggau Tuhan. Ba orang ke udah digaga lurus, dosa sida amat dilemika, tang enda serampur iya dianchurka. Ketegal dosa nya bisi ba siku – siku orang ti arap, nya reti sida begunaka bendar ke pengubah ti sempurna ba dalam pengidup ke nangkannya. Kitai nemu maya timpuh kitai diadaka baru nya, lebuh kitai digaga lurus. Lebuh maya nya, kitai deka berubah ari gamal pemetang ngagai penampak nyelai Tuhan. kitai diubah ari gambar penyai ngagai gambar pemanah Tuhan. Kitai nganti jalai runding chara ti jai enggau jalai runding ti sebaka enggau runding Kristus.

Tang, kati ba senentang nya kitai udah diubah enggau penuh sempurna? Lebuh maya kitai diubah, kati kitai diubah chukup sempurna dalam Tuhan ti ngaga kitai? Jauh paw i ari nya! Kitai sedar, kitai agi bebalut enggau dosa. Lalu pengeleda ke dosa tu ti ngiring ngembing kitai bekerauh ngangauka Kristus ti bekuasa nyelamatkan kitai sereta ulih ngelepaska kitai enggau sempurna. Ketegal nya, orang ti arap tang enda ibuh iga ke semua proses jalai pengudus nya, diadang enda dipadahka pasal pengerusak ba dalam ati sida, tauka sida semina diteguhka nengah teori aja.

Nyangka sekeda orang bepegai ba penemu ti madahka pengudus ke penuh datai lebuh maya orang mati tauka ba jam ke deka datai. Tang, sida tu enda nyengala ibuhka utai ke ba dalam diriempu laban sida nadai berasai nya berguna ba sida; sida nadai agi rindu enggau aus ka dikuduska. Lalu sida enda ulih inginka pengelurus dataika sida nyau meretika bakani sida kebendar. Sida enda ulih ngasaika pengineinka ke diri dikuduska dalam pengidup sida dataika sida nesal nengah jalai ti udah dibantaika

sebedau tu. Dataika timpuh Tuhan muka karung penyai sida enggau mantaika ngagai sida isi semengat sida ti bendar. Dataika ba maya iya, sida ngasai ma berat ketegal dosa sida, ari nya sida deka besampi ngambika dilepaska ari utai ti nyadi ketegal dosa nya. Semina lebu sida nesal, dia sida deka nyerauh dalam pemerinsa semengat sida bakatu; “Anchurka dosa, lalu lepaska semengat aku, aku enda ulih lantang dataika dalam aku dituchi. Dataika aku amat dalam Tuhan.”

3. Kedua, belalauka utai ti diperati, kitai ulih belajar ngadang ari pengasai salah pengudah digaga lurus amat penting ba kitai, ngambika kitai merega reti pengelurus ke bepun ari ditebus ulih darah Kristus. Orang mesti meretika gaya sida enti sida empu meda diri tetap begunaka Kristus ari sebedau sida digaga lurus tauka pengudah sida digaga lurus. Enti nadai pengadang tegap ba diri empu, dia kitai sigi deka meda Sempekat Darah Jesus nya utai ti nadai apa nama, utai ti nadai dalam rantai utai ti diguna kitai. Nya alai kitai ke udah digaga lurus nemu Sempekat Darah nya penting laban dosa kitai udah dibuai. Enti ati kitai enggau pengidup kitai agi enda tuchi beresi, dia kitai meruan berundingka diri salah belama lalu ngembuan pengadang ke deka bebadi belama, kitai mengkang ditanchang ukum dibalut pengasai diri salah. Bah! Minta meh ngagai Iya Tuhan di serega diatu pengentara kitai, ulih pengasih Iya ti nebus kitai, Darah Iya ti berega.

Sebengkah chuan gamal nesal ke penyalah enggau churak pengarap ti dibantaika enggau chukup mantik dalam jaku dibaruh tu; “Aku bedosa dalam tiap kali aku enseput. Aku enda ngereja nundaka peneka Tuhan enggau perintah Iya ba dalam dunya tu, baka ke dikereja bala malikat diserega. Tang ai pengidup sigi meruan nerusul, nuchi kaki enggau pala sereta jari dataika aku amat dikerinduka.”

4. ketiga, sebengkah ukum ti bejaku pasal kitai ti amat nadai daya lalu enda ulih ngetanka tiap utai ti udah diterima sereta nadai daya nyelamatkan kitai empu ari penyai dunya tu, ti malut ba dalam ati sereta serampur pegidup kitai, lalu ari pengidup kitai nya ke deka ngajar kitai enggau bebendar ulih pengarap ngambika kitai begantung pengarap ba Jesus Kristus Raja enggau Imam Besai kitai. Nengah jalai nya, kitai ngemesaika Iya lalu muji Iya atas pengasih Iya ti tinggi, Juruselamat ti chukup entap, lalu enggau beambis ati ngerangkupka Mahkota atas pala Iya. Jaku ti sempurna tu selalu salah dikena, lalu nya kebuah iya lenyau pengering. Taja pia, sida tu deka ngembuan pemereti ke dalam agi sereta bekuasa lebu sida mutarka diriempu diau dalam Jesus Kristus.

Terjemahan ini dilakukan oleh Pensyarah Iban di Sekolah Teologi Methodist, Sibul, Malaysia, Reverend Lembai anak Banyan (lembai@mtssibu.edu.my), berdasarkan pada terjemahan Ir. Heriyanto dalam Gereja Methodist Indonesia Wilayah II, *John Wesley on Christian Beliefs: The Standard Sermons in Bahasa Indonesia (Jilid I: 1-20)* (2005), 185- 202. Kerja asal adalah Kenneth Cain Kinghorn, *John Wesley on Christian Beliefs: The Standard Sermons in Modern English*, Vol. 1, *Sermons 1-20* (Nashville: Abingdon Press, 2002), 228-45.